

## სასწავლო კურსის პროგრამის (სილაბუსის) შედგენის რეკომენდაციები

### მუხლი 1. ზოგადი ნაწილი

1. სასწავლო კურსის პროგრამა (სილაბუსი) შედგენილი უნდა იყოს უნივერსიტეტის აკადემიური საბჭოს მიერ დამტკიცებული ფორმით (2011 წლის 27 აპრილის № 437 დადგენილება).
2. სასწავლო კურსის პროგრამის (სილაბუსის) შემუშავების/შედგენის მონაწილე აკადემიურ პერსონალს უფლება აქვს საგანმანათლებლო პროგრამის ფარგლებში დამოუკიდებლად განსაზღვროს სასწავლო კურსის პროგრამების (სილაბუსების) შინაარსი, სწავლების მეთოდები და საშუალებები.
3. სილაბუსის მომზადების პროცესს კოორდინირებას უწევენ:
  - ა) ფაკულტეტის დონეზე - დეკანატი, შესაბამისი საგანმანათლებლო პროგრამის ხელმძღვანელი, ფაკულტეტის ხარისხის უზრუნველყოფის სამსახური;
  - ბ) საუნივერსიტეტო დონეზე - უნივერსიტეტის ხარისხის უზრუნველყოფის სამსახური, სწავლების დეპარტამენტი.
4. სასწავლო კურსი (საგანი) არის ერთსემესტრიანი.

### მუხლი 2. სასწავლო კურსის სახელწოდება

სასწავლო კურსის სახელწოდება უნდა შეესაბამებოდეს მის შინაარსს. სახელწოდება მოცემული უნდა იყოს როგორც ქართულ, ასევე, ინგლისურ ენებზე.

### მუხლი 3. სასწავლო კურსის კოდი

კოდის მინიჭების არსებული წესი არ შეესაბამება განათლების სისტემის მარეგულირებელ სამართლებრივ აქტებში უკანასკნელ პერიოდში განხორციელებული ცვლილებების მოთხოვნებს. ეს პუნქტი შეივსება ახალი წესის მიღების შემდეგ.

### მუხლი 4. საგანმანათლებლო პროგრამის სახელწოდება

1. ჩაიწერება იმ საგანმანათლებლო პროგრამის სახელწოდება, რომლის სასწავლო გეგმაშიც არის აღნიშნული კურსი.
2. თუ სასწავლო კურსი არის ბაკალავრიატის დამატებითი სპეციალობის საგანმანათლებლო პროგრამის სასწავლო გეგმაში, საგანმანათლებლო პროგრამის სახელწოდების შემდეგ ფრჩხილებში უნდა მიეთითოს სიტყვა "დამატებითი".
3. ერთი და იგივე შინაარსისა და მოცულობის საგანი ყველა საგანმანათლებლო პროგრამის სტუდენტისათვის მოიცავს თანაბარი რაოდენობის კრედიტებს.

### მუხლი 5. საათების განაწილება სტუდენტის დატვირთვის შესაბამისად (კვირა/სემესტრი)

ამ პუნქტში მოცემული უნდა იყოს სტუდენტის დატვირთვა (სტუდენტის სასწავლო საქმიანობა) სწავლების ფორმების მიხედვით. თითოეული ჩანაწერი კეთდება სასწავლო კვირისა და სემესტრის მიხედვით. მაგალითად, ლექციის გასწვრივ მოცემული ჩანაწერი "1/15" ნიშნავს, რომ აღნიშნულ კურსში გათვალისწინებულია კვირაში 1 ლექცია, ხოლო სემესტრში - 15. ისეთი კომპონენტებისათვის, როგორცაა, მაგალითად, პრაქტიკა და დამოუკიდებელი სამუშაო, ფაქტობრივად, შეუძლებელია დატვირთვის განსაზღვრა თითოეული კვირის მიხედვით. ამიტომ, ასეთ შემთხვევაში, მიზანშეწონილია, მიეთითოს მხოლოდ საათების ჯამური რაოდენობა. მაგალითად, "-/60", ნიშნავს, რომ აღნიშნული კომპონენტის შესაბამისი ჯამური (სემესტრული) დატვირთვა არის 60 საათი, ხოლო მისი თანაბარი განაწილება კვირების მიხედვით ვერ ხერხდება. სტუდენტის სრული დატვირთვა შესაბამისობაში უნდა იყოს სასწავლო კურსის კრედიტების რაოდენობასთან.

### მუხლი 6. დაშვების წინაპირობები

1. დაშვების წინაპირობები ჩაიწერება არსებობის შემთხვევაში. დაშვების წინაპირობების განსაზღვრის მიზანია პირის კომპეტენტურობის წინასწარი იდენტიფიცირება, რათა შესაძლებელი იყოს პროგრამით გათვალისწინებული სწავლის შედეგების მიღწევა.
2. დასაშვებია სასწავლო კურსის შეთავაზება უცხოურ ენაზე. მისი გავლის წინაპირობად აუცილებელია შესაბამისი უცხოური ენის ფლობის დადგენა და გამოსაყენებელი ლიტერატურის

უცხოურ ენაზე მითითება. სასწავლო კურსის უცხოურ ენაზე შეთავაზების შემთხვევაში პროგრამა უნდა შედგეს ორ ენაზე - ქართულ და შესაბამის უცხოურ ენაზე.

3. ამ მუხლის მე-2 პუნქტში მოცემული პირობები წინაპირობად უნდა იყოს მითითებული როგორც ამ სასწავლო კურსში, ასევე, იმ საგანმანათლებლო პროგრამასა და მოდულში, სადაც ეს სასწავლო კურსი აუცილებელ კომპონენტად არის წარმოდგენილი.

### **მუხლი 7. შინაარსი**

ამ პუნქტში მოცემული ცხრილებიდან შეივსება მხოლოდ სტუდენტის დატვირთვის შესაბამისი ცხრილები. გამოუყენებელი ცხრილები უნდა ამოიშალოს.

### **მუხლი 8. სწავლის შედეგების მიღწევის ფორმები და მეთოდები**

1. ამ პუნქტში აღინიშნება პროგრამით გათვალისწინებული შედეგების მიღწევისათვის აუცილებელი სწავლების ფორმები სტუდენტის დატვირთვის სქემის შესაბამისად (მუხლი 5).
2. აქვე შეიძლება ჩაიწეროს სასწავლო კურსის პროგრამით გათვალისწინებული შედეგების მიღწევისათვის აუცილებელი სწავლების მეთოდები. იგულისხმება როგორც ტრადიციული, ასევე, ე. წ. ინტერაქტიული მეთოდები, როგორცაა, საქმიანი თამაშები, როლების მოდელირება, ჯგუფური განხილვა, დისკუსია და სხვ.

### **მუხლი 9. ძირითადი და დამხმარე ლიტერატურა**

1. ძირითად ლიტერატურაში მითითებული უნდა იყოს მხოლოდ იმ ენაზე შესრულებული წყაროები, რომელზეც ხორციელდება სწავლება. უცხოურენოვანი წყაროები შესაძლებელია მიეთითოს დამხმარე ლიტერატურაში.
2. იმ შემთხვევაში, თუ არ არსებობს შესაბამისი ლიტერატურა იმ ენაზე, რომელზეც ხორციელდება სწავლება, აუცილებელია მომზადდეს ლექციების კურსი, რომლის ნაბეჭდი და ელექტრონული ვერსიები უნდა იყოს უნივერსიტეტის ცენტრალურ ბიბლიოთეკაში.
3. თითოეული მითითებული წყარო თავისუფლად ხელმისაწვდომი უნდა იყოს, აღნიშნული უნდა იყოს მისი ფორმა (მაგალითად, ელექტრონული და სხვ.) და ძირითადი ლიტერატურის წყაროების მოძიების რეკვიზიტები (მაგალითად, ბიბლიოთეკის შიფრი).
4. ყველა წყარო დანომრილი უნდა იყოს გამჭოლი ნუმერაციით. დამხმარე ლიტერატურაში მითითებული წყაროების ნუმერაცია გააგრძელებს ძირითადი ლიტერატურის წყაროების ნუმერაციას (მაგალითად, თუ ძირითად ლიტერატურაში მითითებული გვაქვს 3 წყარო, დამხმარე ლიტერატურის პირველ წყაროს ექნება ნომერი 4 და ა. შ.). ასეთ შემთხვევაში ნომრის მიხედვით გასაგები იქნება წყარო ძირითად ლიტერატურას ეკუთვნის თუ დამხმარეს.

### **მუხლი 10. სასწავლო კურსის (სილაბუსის) დამტკიცება**

1. სასწავლო კურსის პროგრამის (სილაბუსის) დამტკიცება ხდება უნივერსიტეტის აკადემიური საბჭოს მიერ დამტკიცებული წესის შესაბამისად (2011 წლის 27 აპრილის № 437 დადგენილება).
2. პროგრამას ხელს აწერენ ავტორი (შემდგენელი) და ფაკულტეტის ხარისხის უზრუნველყოფის სამსახურის უფროსი, რომლებიც თავისი ხელმოწერით ადასტურებენ, რომ პროგრამა შედგენილია მოთხოვნების შესაბამისად და უზრუნველყოფილია სათანადო ადამიანური და მატერიალური რესურსებით.
3. სასწავლო კურსის პროგრამას (სილაბუსს) ხელს აწერს შესაბამისი საგანმანათლებლო პროგრამის ხელმძღვანელი, რომელიც თავისი ხელმოწერით ადასტურებს, რომ პროგრამა შეესაბამება საგანმანათლებლო პროგრამის მოთხოვნებს.
4. სასწავლო კურსის პროგრამის (სილაბუსის) მიღება ხდება ფაკულტეტის საბჭოს სხდომაზე. ფაკულტეტის საბჭო განიხილავს პროგრამას და, დადებითი გადაწყვეტილების შემთხვევაში, გადასცემს უნივერსიტეტის ხარისხის უზრუნველყოფის სამსახურს შესათანხმებლად.
5. პროგრამა ძალაში შედის უნივერსიტეტის ხარისხის უზრუნველყოფის სამსახურთან შეთანხმების თარიღიდან.
6. შეთანხმებული სასწავლო კურსის პროგრამა (სილაბუსი) ფორმდება ორ ეგზემპლარად და თან ერთვის შესაბამისი საგანმანათლებლო პროგრამის ორ ეგზემპლარს.